


Pretoriana



TYDKSRIF VAN DIE GENOOTSKAP OUD-PRETORIA
(PRETORIASE HISTORIESE VERENIGING)

JOURNAL OF THE OLD PRETORIA SOCIETY
(THE PRETORIA HISTORICAL ASSOCIATION)

Prys R 4,00 PRICE

PRETORIANA nr/no 95 - April 1989

Bestuurslede van die Genootskap Oud-Pretoria (die Historiese Vereniging van Pretoria) op 1 April 1989

Dr. N.A. Coetzee, voorsitter

Mnr. W.J. Punt, ondervoorsitter, bewaring van geboue

Mev. M.J. Willmer, sekretaresse

Mnr. S. de K. Venter, verteenwoordiger van die Stadsraad van Pretoria

Mev. M. Andrews, organisasie van toere

Mnr. T.E. Andrews, "Nuusbrief", bewaring van begraaflase en forte

Mev. M. Bees, organisasie van byeenkomste

Mev. A. Dreyer, argief

Dr. C. de Jong, redakteur van "Pretoriana"

Mnr. C.J. Reinecke, penningmeester

Mev. I. Vermaak, posbestellings

Mnr. E. Zapke, skooltuinwedstryde

Die posbusnommer van die sekretariaat is 4063, Pretoria 0001, die telefoonnommer is (012) 703 052

- o -

"PRETORIANA" - AFRICANA

Offer to purchase back-copies of "Pretoriana"

Can you now buy a history book of 300 pages for under R50,00?
No!

But you can buy over 2000 pages of Pretoria history for R20,00!
Contact Anton Jansen at telephone number (012) 908 9406 after office hours or at (012) 706 456 during office hours to arrange for a set of "Pretorianas" to be collected by you or delivered to you. Only a few issues are now out of stock.

You can also obtain loose copies, issued before 1980, at R1,00 each, if in stock.

Anton Jansen's postal address is: P O BOX 33 704, GLENSTANTIA, PRETORIA 0010.

PRETORIANA No./Nr. 95, April 1989

TABLE OF CONTENTS/INHOUDSOPGAWE

	Page/ Bladsy
From the editor/Van die redakteur	2
The Old Pretoria Society/Genootskap Oud-Pretoria 1948-1988	3
Genootskap Oud-Pretoria - 1948-1988 - Old Pretoria Society - Toespraak van die voorsitter	3
Stigting Simon van der Stel vereer Genootskap Oud-Pretoria: Nominasie vir medalje-toekenning aan die Genootskap Oud-Pretoria	8
J. Ploeger, "Veertig jaar Genootskap Oud-Pretoria (2) - Die tydperk 1958-1968"	12
Nederlandsche Zuid-Afrikaansche Spoorweg-Maatschappij (NZASM)	31
Robert C. de Jong, "Beknopte geskiedenis van die Nederlandsche Zuid-Afrikaansche Spoorweg-Maatschappij" (4)	31
Book review article: A third memorial work on the NZASM Review by C. de Jong of: R.C. de Jong, G.M. van der Waal and D.H. Heydenrych, "NZASM 100", Pretoria 1988	39
Nedbank 1888-1988	44
C. de Jong, "Uit die geskiedenis van die Nedbank (1) 1888-1938-1988, Die Nedbank 50 en 100 jaar"	44
C. de Jong, "Hendrik Jan de Graaff, Nedbankman en kultuurman, 1902-1988"	49
Afrikanerboere in Oos-Indië	54
Declaration of loyalty to the King	54
C. de Jong, "Die blanke boere in Oos-Indië, onder wie die laaste Afrikaners van Ceylon, 1903-1962 (3) - Die Onversoenlikes een vir een"	55
The Bushveldt Carbineers (BVCs)	77
Book review article: The Bushveldt Carbineers, no scapegoats of the Empire Review by C. de Jong of: Arthur Davey, "Breaker Morant and the Bushveldt Carboneers, edited with commentary", Van Riebeeck Society, Cape Town 1987	77
Poem by Henry Morant, the Breaker, "The Brigalow Brigade"	81

PRETORIANA no. 95, April 1989

FROM THE EDITOR

"Pretoriana" no. 95 opens with our Chairman's speech at the celebration of the 40th anniversary of the Old Pretoria Society on 2 September 1988 and with the commendatio at the granting of an honorary medal by the Simon van der Stel Foundation to the celebrating Society. Dr. J. Ploeger continues his history of our association.

The series on the Nederlandsche Zuid-Afrikaansche Spoorweg-Maatschappij (Dutch - South African Railway Company; NZASM) is continued with the fourth and last article by Robert C. de Jong, followed by a bookreview of the recently published jubileework by R.C. de Jong, G.M. van der Waal and D.H. Heydenrych, "NZASM 100". Dr. Ploeger has published a review of the same book in the "South African Journal of Cultural and Art History", volume 3 no. 2, Pretoria 1989.

In 1988 the Nedbank celebrated its centenary. C. de Jong offers his first article on the history of this bank and a short biography of a typical Nedbankman and Pretorian, Mr. H.J. de Graaff, who died on 7 December 1988. C. de Jong publishes his third contribution on the Afrikaner farmers in the East Indies, 1903-1962. - Professor Arthur Davey, ex-member of the board of our Society, has recently published a book on the Bushveldt Carbineers. It is reviewed in this issue. A poem of Henry Morant the Breaker, the most reputed of the Bushveldt Carbineers, appears on the last page.

VAN DIE REDAKTEUR

"Pretoriana" no. 95 begin met ons voorsitter se rede by die viering van die 40-jarige bestaan van die Genootskap op 2 September 1988 en met die commendatio by die toekening van 'n erepenning deur die Stigting Simon van der Stel aan die 40-jarige Genootskap. Kol. dr. J. Ploeger vervolg sy reeks oor die geskiedenis van ons vereniging.

Die artikelreeks oor die Nederlandsche Zuid-Afrikaansche Spoorweg-Maatschappij (NZASM) word voortgesit met die vierde en laaste bydrae van Robert C. de Jong oor die geskiedenis van dié Maatschappij en met 'n boekbespreking van die onlangs gepubliseerde jubileumwerk "NZASM 100" deur R.C. de Jong, G.M. van der Waal en D.H. Heydenrych. Dr. Ploeger het dieselfde boek bespreek in die "Suid-Afrikaanse Tydskrif vir Kultuur- en Kunsgeskiedenis", jaargang 3 no. 2, Pretoria 1989.

In 1988 het die Nedbank sy 100-jarige bestaan herdenk. C. de Jong bied sy eerste artikel oor dié bank aan. Daarna volg 'n lewenskets van 'n tipiese Nedbankman en Pretorianer, mnr. H.J. de Graaff, wat op 7 Desember 1988 oorlede is. - C. de Jong vervolg sy reeks oor die Afrikanerboere in Oos-Indië, 1903-1962. - Professor Arthur Davey, oudbestuurslid van ons Genootskap, het onlangs 'n boek oor die Bushveldt Carbineers gepubliseer; dit word hier bespreek. 'n Gedig van Henry Morant the Breaker, die bekendste van die Bushveldt Carbineers, verskyn op die laaste bladsy.

GENOOTSKAP OUD-PRETORIA 1948-1988 OLD PRETORIA SOCIETY

'n Gesellige byeenkoms en vingerete op die aand van 2 September 1988 om die 40-jarige bestaan van die Genootskap Oud-Pretoria (Die Historiese Vereniging van Pretoria) te vier, is gehou. Die Voorsitter Dr. N.A. Coetzee het die feesrede voor ongeveer 250 gaste en lede in die Nasionale Kultuurhistoriese Museum in Boomstraat uitgespreek.

"Geagte meneer die Onder-Burgemeester Nico Vlok en mevrou Vlok, lede van die Genootskap en gaste, u is hartlik welkom by die 40ste verjaarsdag van hierdie historiese vereniging wat op 22 Maart 1948 onder die naam Genootskap Oud-Pretoria gestig is.

"Ons bring hulde aan die stigters vir hierdie vérsiende daad en noem hulle name hier om eer aan hulle te bewys.

"Dr. W.H.J. Punt (Voorsitter en dryfkrag), mnr. Melt van Niekerk, Dr. A.G. Ueckermann, mev. Estelle Lane, Dr. Coenraad Beyers, Dr. F.V. Fitzsimons, Dr. Jan Ploeger, prof. A.N. Pelser, mnr. P.J.H. Basson, mej. Cobie Court, mnr. Albert Kuit, mnr. H.P.N. Behrens, Dr. P.J. du Toit, Dr. S.P. Engelbrecht, mev. W. Cooper, Dr. F.C.L. Bosman, mnr. N.T. Cooper, mnr. J.H. Mouton, Dr. Danie Smal, mnr. S.L. van Wyk en Dr. F.J. du Toit Spies.

"Hierdie persone het ook op ander terreine hulle merk gemaak. Van hulle lewe nog net Dr. F.J. du Toit Spies en mnr. N.T. Cooper, wat ons vanaand hier verwelkom, asook Dr. J. Ploeger wat weens ongesteldheid nie teenwoordig kan wees nie; hy lewer egter bydraes aan ons tydskrif "Pretoriana" oor die ontstaan, riglyne en werksaamhede van die Genootskap wat u in die eerskomende publikasies sal lees. Ons dank hom vir hierdie navorsing. Daarom hoef ek u nie vanaand besig te hou om die prestasies van die Genootskap op te som nie. Buitendien het die Stigting Simon van der Stel se Nasionale Hoofbestuur besluit om 'n goue medalje aan die Genootskap Oud-Pretoria toe te ken vir sy uitstekende diens aan erfenisbewaring oor die 40 jaar. Daar sal 'n oorkonde op Vrydag 9 September op Potchefstroom saam met die goue medalje oorhandig word aan ons Voorsitter, met 'n opsomming van die prestasies wat daardeur erken word."

Die plaaslike voorsitter van die Stigting Simon van der Stel, Pretoria-Tak, dr. Albrecht Holm, word aan die woord gestel om die aankondiging te doen insake die toekenning van die goue medalje. Die volledige motivering vir hierdie toekenning word hier gepubliseer. Die Voorsitter bedank die Stigting Simon van der Stel by voorbaat.

Vervolgens het Dr. N.A. Coetzee hulde gebring aan die agt voorsitters van die Genootskap Oud-Pretoria wat oor 40 jaar die leiding in hande geneem het, soos deur die lede van tyd tot

tyd verkies.

Dr. W.H.J. Punt, 1948-1959, 11 jaar
 Dr. G. v.W. Eybers, 1960-1964, 5 jaar
 Dr. T.S. van Rooyen, 1965-1966, 2 jaar
 Dr. N.A. Coetzee, 1967-1969, 3 jaar
 Mnr. N.L. van der Walt, 1970-1973, 4 jaar
 Mnr. W.S. Robertson, 1974-1976, 3 jaar
 Dr. C.J.P. Jooste, 1977-1982, 6 jaar
 Dr. N.A. Coetzee, 1983-1988, reeds 6 jaar.

Dr. C.J.P. Jooste word by die vergadering verwelkom. Nog net die laaste twee genoemde voorsitters is in lewe en hier teenwoordig.

Nie alleen die Voorsitters was verantwoordelik vir die erfenisbewaring oor die 40 jaar nie, hulle is getrou bygestaan deur die bestuurslede van die Genootskap. Die Voorsitter bring eer en erkenning aan hierdie harde werkers deur die huidige bestuurslede een vir een op te roep en aan die vergadering voor te stel. Elkeen word ook toegelaat om kortliks 'n woord tot die byeenkoms te spreek om te sê wat hy of sy op die hart het. Hulle dien sonder vergoeding en elkeen het sy afsonderlike veld van aktiwiteit. Die volgende word deur die Voorsitter voorgestel en van harte bedank.

Mnr. Willem Punt, tans visie-voorsitter en seun van die stigter Dr. W.H.J. Punt. Mnr. Punt sê dat hy nog die tee bedien het by die stigtingsvergadering 40 jaar gelede, toe hy nog 'n seun was.

Mev. Mollie Willmer, tans sekretaresse, is verantwoordelik vir die notules van vergaderings en vir sekere deel van die korrespondensie.

Mev. Ina Vermaat is verantwoordelik vir die uitsending van alle korrespondensie, sirkulêres, die "Nuusbrief" en "Pretoriana" aan lede. Sy doen hierdie veeleisende taak met toewyding en vreugde.

Mnr. Sarel Reinecke is tans die penningmeester, hy hou die boeke wat jaarliks deur 'n geoktrooieerde rekenmeester geouditeer word, en hy stuur die rekenings vir lidmaatskapsgelede uit. Met hierdie inkomste kan die Genootskap voortgaan met sy werk en lede word bedank vir hulle getrouheid met die betaling van ledegeld.

Dr. C. de Jong, die huidige redakteur van "Pretoriana", is tans besig met die 94-ste uitgawe. Oor die 40 jaar het die tydskrif dus meer dikwels as elke halfjaar verskyn. Die gehalte is besonder hoog, "Pretoriana" is 'n gesogte blad in Suid-Afrika en oorsee. Sonder die ledegeld wat ontvang word, sal "Pretoriana" nie so getrou gepubliseer kan word nie, gesien die geweldige styging van drukkoste in ons tyd. Die eerste uitgawe van "Pretoriana" het in September 1951 verskyn. Daar is van die ou nommers beskikbaar vir R20 per bondel, waarin

slegs enkele uitgawes ontbreek.

Tom E. Andrews en Merl Andrews moet as huwelikspaar saam genoem word in verband met die bustoere wat die Genootskap elke maand en in vakansies aanbied. Tom Andrews ken Pretoria en omgewing se geskiedenis beter as baie ander en hy tree as gids op tydens toere. Merl doen die organisasie en verskaf die verversings. Die Genootskap Oud-Pretoria doen met die bustoere eintlik die werk van die Pretoriase Stadsraad om besoekers, sommige van oorsee, die besienswaardighede van die stad en omgewing te laat sien, soos dit in Kaapstad en Durban deur die Stadsraad self gedoen word. Geen finansiële bystand word egter deur die Stadsraad verskaf met die huur van die busse nie. Ook word Tom en Merl bedank vir die organisasie van die uitstalling van die Genootskap met die afgelope Pretoria-Skou. Dit het duidelik geword dat die instelling van 'n museum deur die Genootskap dringend is. Tom Andrews word ook bedank vir die publikasie van die maandelikse "Nuusbrief" waarvan nommer 118 reeds verskyn het. Hy hou verder die lede op hoogte van sake in verband met die aktiwiteite van die Genootskap.

Mev. A. Dreyer, die argivaris, sorg vir die opberging van die dokumente en voorwerpe van die Genootskap in bruikleen in die Transvaalse Argief in die Uniegebou, waar dit vir navorsers ter insae gestel word. Sommige van hierdie materiaal hoort tuis in die voorgenome museum van die Genootskap.

Mnr. E. Zapke organiseer die jaarlikse Skooltuinekompetisie, wat nou vir laerskole en hoërskole in die Pretoriase Skoolraadsgebied gehou word. Ingestel in 1955 as die Genootskap se bydrae tot die 100-jarige fees van die stad Pretoria, dra dit by tot die opvoeding van die jeug om sy omgewing te verfraai, om inheemse plantegroei te bevorder, om arbeidsaam te wees in tuinmaak en om die omgewing skoon te hou. Daar is twee skilde en twee bekere waarom tans megeding word. Die hoofde van die skole word bedank vir hulle jaarlikse deelname en inskrywing in kompetisie.

Mnr. R. Tomlinson is verantwoordelik vir die bewaring van die forte in en om Pretoria. Hy het waardevolle diens gelewer in verband met die skoonmaak en oopstelling van die terreine van Wesfort en Fort Wonderboom as besienswaardighede.

Ten laaste wil ons mevrou M. Bees bedank vir die organiseer van ons funksies. Ook vanaand se byeenkoms en die ete wat vir u wag, is grootliks haar en Merl Andrews se werk en alles verloop glad en effektief. Die Bestuur besluit op die datum en plek van 'n byeenkoms en dan word die res oorgelaat aan Martha Bees. Ons dank haar vir haar getrouheid.

Die verteenwoordigers van die Stadsraad op die Bestuur Dr. C.F. Swart en mnr. S. de K. Venter, word ook deur die Voorster bedank vir hulle diens en skakeling met die Stadsraad.

Vervolgens gee die Voorster 'n oorsig van sake waaraan in

die toekoms die Genootskap aandag sal moet skenk.

Die bewaring en restaurasie van die enigste tremhuisie wat in Pretoria oorgebly het, op die hoek van Kerk- en Zeederbergstraat, is onder hande. Anton Jansen word bedank vir sy advies en hulp daarby. Die Genootskap het die tremhuisie van vernietiging gered deur sy bereidwilligheid aan die Stadsraad te verklaar om dit te huur, soos bepaal, teen R48 per jaar, te restoreer en in diens van die gemeenskap te stel.

Ons dink aan die volgende landmerke en historiese geboue vir die toekoms en die verklaring daarvan tot Nasionale Gedenkwaardighede.

- Die Erasmus-kasteel en die twee naburige pioniershuise wat nou gerestoureer word en die oopstelling daarvan as moontlike museums vir die publiek.
- Die bewaring van die Doors Erasmus Huis, Pretoria-Noord.
- Die ou hoofkantoor van die Pretoriase Munisipale Slagpale in Mitchellstraat.
- Die Victoria Hotel naby die stasie in Paul Krugerstraat.
- Die Western Hotel in Mitchellstraat.
- Die Pierneef-Huis en -Ateljee in die Dieretuingronde, De Waalstraat 25, waarvan Pierneef self sketse van buite en binnehuis nagelaat het.
- Die gebruik van die interieur van die Capitol Teater aan Kerkplein en die behoorlike inrigting daarvan vir die doeleindes soos bepaal.
- Die ou tremloodse in Van der Waltstraat en die gebruik daarvan.
- Die aanbring van die derde J.J. Kirkness Gedenkplaat by Kirkney.
- Industriële terrein voor Brickor se steenoonde aan Van der Hoffweg.
- Die hele wesfasade van Kerkplein as Nasionale Gedenkwaardighede.
- Die bewaring van die Ou Reserwebankgebou en die gebou van Ons Eerste Volksbank, en die moontlike inrigting van 'n museum van die Genootskap op een van die vloere in samewerking met die Stigting Simon van der Stel.
- Die aanbring van twee gedenkplate aan die ou NZASM-spoorbrug by die Fonteinedal.
- Die versiering van die ou begraafplaas Du Preezhoek by die brug in Fonteinedal en die oprigting van 'n eremonument vir die grondleggers van Pretoria wat in 1842 hulle Voortrekkerwaens in die Fonteinedal uitgespan en besluit het om daar te bly, die families Bronkhorst, Minnaar, Du Preez, Schutte, Van der Walt, Du Toit, Pretorius en Fourie. Die ander bewaringsinstansies en die Stadsraad se samewerking sal hiertoe verkry

word met die 150-jarige herdenking van hierdie stigters van Pretoria, in 1992; hulle huisfondamente lê nog in Elandspoort.

Die Voorsitter sluit af deur die Onder-Burgemeester mnr. Nico Vlok te bedank vir sy teenwoordigheid saam met mev. Vlok, en die lede van die Genootskap wat hierdie 40-jarige herdenkingsfees van die Genootskap moontlik gemaak het deur dit (elk afsonderlik) te finansier. Almal word uitgenooi om aan die ete deel te neem en gesellig en feestelik met mekaar te verkeer.

- o -



Mnr. W.A. Cruywagen, nasionale voorsitter van die Stigting Simon van der Stel, oorhandig die Stigting se goue erepenning aan Dr. N.A. Coetzee, die voorsitter van die Genootskap Oud-Pretoria.

STIGTING SIMON VAN DER STEL VEREER GENOOTSAP OUD-PRETORIA

Dr. Albrecht Holm, voorsitter van die tak Pretoria van die Stigting Simon van der Stel, het die volgende brief aan Dr. N.A. Coetzee as voorsitter van die Genootskap Oud-Pretoria gerig:

Stigting Simon van der Stel

5 Augustus 1988

Die Voorsitter
Genootskap Oud-Pretoria
p/a Dr N A Coetzee
Posbus 4063
PRETORIA
0001

Geagte dr Coetzee

TOEKENNING VAN GOUE MEDALJE

Dit doen ons genoeg om u mee te deel dat die Nasionale Raad van Stigting Simon van der Stel besluit het om aan die Genootskap Oud-Pretoria 'n goue medalje toe te ken vir sy jarelange bydrae tot erfenisbewaring. Die medalje sal oorhandig word op Vrydag 09/09/1988 om 18h00 in die Sinodesaal van die Gereformeerde Kerk te Potchefstroom en ons verneem graag of dit vir u moontlik sal wees om teenwoordig te wees. Aangeheg vind u 'n afskrif van die motivering van Pretoria-Tak wat gelei het tot die Genootskap se benoeming as een van die medaljeontvangers. Ons wil u graag hiermee van harte gelukwens en verneem graag spoedig of u die benoeming aanvaar en in Potchefstroom teenwoordig kan wees.

Met vriendelike groete
die uwe

w.g. A HOLM

25 Julie 1988

NOMINASIE VIR MEDALJE-TOEKENNING: DIE GENOOTSAP OUD PRETORIA (OPGERIG 22 MAART 1948)

Deels na aanleiding van die toe reeds bestaande bedreiging vir die Wesfasade en Kerkplein is die Genootskap Oud Pretoria deur wyle Dr W H J Punt in die lewe geroep. Die Genootskap is die oudste plaaslike historiese vereniging opgeteken in Suid-Afrika.

Doelstellings is die bewaring, beskerming, bevordering en publisering van die plaaslike geskiedenis in al sy manifestasies: vertellings, boeke, dokumente, fotos, prente, geboue, plekke, omgewings en name.

Uitvoering vind plaas by wyse van:

- Opnames van vertellings van ou Pretorianers.
- Navorsing oor die plaaslike geskiedenis.
- Argiefbewaring van geskiedenis in die Genootskap se eie argiefversameling in die Staatsargief.
- Publisering veral deur Pretoriana, die Genootskap se tydskrif, sedert 1953 en die maandelikse Nuusbrief.
- Vergaderings, lesings en vertonings.
- Besoeke aan plekke van belang.
- Bustoere sedert 1973.
- Deelname aan bewaringsaksies met andere, bv. Lystingskomitee.
- Inisiëring van die bewaringsaksies.
- Merk van historiese plekke.
- Sedert sy totstandkoming verteenwoordig op die Stadsraad se Advieskomitee oor Straat- en Plekname.
- Lid van die Komitee vir Nouer Skakeling tussen die Stadsraad en Bewaringsinstansies.

Voorbeelde

- Gedenkplate by historiese plekke - Ou Raadsaal (brons), Kya Rosa (brons), J.F. Celliers-huis (brons op woonstelgebou), Kirkness-kantoor (brons Poskantoor Kerkplein), Kirkney (brons by Hercules), NZASM-brug (blou), J Punt- en W H J Punt-huise en Pierneef-huis (blou), marmarplate op grafte van H M Rex en W H J Punt.
- Die groot aksie destyds ongeveer 1950 vir die bewaring van die Bras Pereira-huis (nie geslaag).
- Bewaringsaksie vir behoud van Staatsmodel School (geslaag) en Staatsgimnasium (nie geslaag).
- Deelname aan die Kerkplein-stryd.
- "Pretoriana" het nou reeds 94 uitgawes bereik.
- Ledetoere, reeds in Pretoria-omgewing byna 100 kort toere (1 dag) aangebied en 10 lang toere (4 dae) na Oos-Transvaal, Suid-Transvaal, Kimberley, Wes-Transvaal en Natal.
- Genootskap is insteller van "Pretoria-dag". Elke jaar op Saterdag naaste aan 16 November (Pretoria se geboortedag) word 'n spesiale kort toer aangebied na die graf of huis van 'n Pretoria-Pionier waar daar 'n krans gelê en 'n kort lesing oor hom gegee word.
- Genootskap het gereël dat Stadsraad begin met byskrifte op Straatnaamborde. Genootskap het betaal vir die borde op al die kruisings van Paul Krugerstraat en Scheiding- tot Boomstraat.
- Genootskap verhoed slooping van Fort Wonderboom 1965.
- Dien tans op restaurasiekomitee.
- Bewaring van tremhuisie aan Kerkstraat.
- Aanvanklik onderhandelings met Krygkor wat lei na restaurasie van Erasmuskasteel en pionierswonings.

- Opsporings en dokumentering van fortifikasies in Pretoriaomgewing.

- Skooltuine-kompetisie word sedert 1955 elke jaar gehou om skoolkinders omgewingsbewus te maak en aandag op uitheemse plante te vestig (wisseltrofeë).

- Restourasie van Booysen Voortrekker Begraafplaas, Van der Hoffweg.

Die bestuur van die Genootskap werk op die portefeuljestelsel met posbekleërs vir Toere, Nuusbrief, Argief, Werksaamheid, Straatname, Pretoriana, Vergaderings, Grafte, Forte, Lysingskomitee, Finansies, Gedenkplate.

Die Genootskap Oud-Pretoria is hierdie jaar 40 jaar oud en dus ouer as Stigting Simon van der Stel. Alhoewel die styl en metodes heelwat verskil van dié van ons Pretoria-Tak, is die samewerking tussen die twee verenigings in jongste tyd baie goed. Ons streef dieselfde uiteindelijke doel na en vul mekaar op 'n gesonde manier aan. Baie van die lede van Genootskap Oud-Pretoria is ook lede van Stigting Simon van der Stel en andersom.

Ons is oortuig daarvan dat die toekenning van 'n medalje aan Genootskap Oud-Pretoria op hulle 40ste verjaardag 'n sinvolle teken van die uitreiking van die hand van vriendskap sal wees.

GETEKEN: A HOLM

Dr. N.A. Coetzee, voorsitter van die Genootskap Oud-Pretoria, het die goue medalje in ontvangs geneem en die volgende dankwoord uitgespreek:

"Mnr. die Nasionale President van die Stigting Simon van der Stel, Sy Edele mnr. W.A. Cruywagen,

"Namens die lede van die Genootskap Oud-Pretoria ontvang ek met dank en waardering hierdie goue medalje van die Stigting Simon van der Stel, om die veertig jare van diens van die Genootskap in die bewaring van ons geskiedkundige en kulturele erfenis in en om Pretoria te gedenk.

"In u oorkonde en motivering van hierdie toekenning het u met reg gewag gemaak van die uitstekende diens van die Genootskap Oud-Pretoria as die Historiese Vereniging van Pretoria, en ons dank u vir die lys van prestasies wat u nagespeur het met behulp van u Pretoria-Tak. Ons innige dank aan die voorsitter, mnr. Albrecht Holm, en sy Komitee. Ons is ook dankbaar vir die ondersteuning en samewerking wat ons verkry van u Raad en die Pretoria-Tak van die Stigting Simon van der Stel. Met reg doen u mee aan die uitbouing van die werksaamhede van plaaslike historiese verenigings wat in ons groot stede tot stand gekom het. In Pretoria kan ons, behalwe die sake in u brief en motivering genoem, ook nog meld die aanvoerwerk wat die Genootskap Oud-Pretoria gedoen het in die oprigting van